



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE
DREJTORIA E PËRGJITHSHME PËR MBROJTJEN E TË DHËNAVE PERSONALE
DREJTORIA E MBIKËQYRJES NË FUSHËN E DREJTËSISË PENALE DHE
SIGURISË PUBLIKE

Nr. 136 prot.

Tiranë, më 14.01.2026

REKOMANDIM

Nr. 01, datë 14.01.2026

PËR

**KONTROLLUESIN QENDRA “INSTITUTI I MIGRACIONIT, ZHVILLIMIT
DHE INTEGRIMIT”**

Në mbështetje të neneve 81, 82, 83 dhe 84 të ligjit nr. 124/2024 “Për mbrojtjen e të dhënave personale” (në vijim, “Ligji”), neneve 77-112 të ligjit nr. 44/2015 “Kodi i Procedurave Administrative të Republikës së Shqipërisë” (në vijim, “Kodi i Procedurave Administrative”), si dhe provave të administruara në ngarkim të kontrolluesit Qendra “Instituti i Migracionit, Zhvillimit dhe Integrimit” (në vijim, “Kontrolluesi ose Qendra”),

KONSTATOVA SE:

Në zbatim të Urdhrit nr. 267, datë 03.12.2025 të Komisionerit për të Drejtën e Informimit dhe Mbrojtjen e të Dhënave Personale (në vijim, “Komisioneri”), u krye hetimi administrativ pranë Kontrolluesit, me objekt:

- Zbatimi i ligjit nr. 124/2024 “Për mbrojtjen e të dhënave personale” dhe akteve të miratuara nga Komisioneri në lidhje me mbledhjen, përpunimin, ruajtjen dhe sigurinë e të dhënave personale, gjatë kryerjes së aktivitetit nga Kontrolluesi.

Komisioneri, pasi shqyrtoi relacionin e hetimit administrativ, procesverbalin e konstatimit dhe provat e administruara gjatë ushtrimit të hetimit pranë Kontrolluesit, vëren se:

1. Kontrolluesi është një organizatë jofitimprurëse, e regjistruar në regjistrin e OJF-ve, me Vendimin nr. 732, datë 02.04.2012, të Gjykatës së Shkallës së Parë të Rrethit Gjyqësor, Tiranë.

Qendra, në cilësinë e kontrolluesit, ka si objekt të veprimtarisë promovimin e vlerave shoqërore dhe profesionale nëpërmjet organizimit të trajnimeve, programeve të formimit dhe aktiviteteve zhvilluese në nivel qendror dhe lokal, për organizma publikë dhe jopublikë. Qendra angazhohet gjithashtu në mbështetjen e proceseve të integritit të shoqërisë shqiptare drejt standardeve europiane dhe globale, përmes edukimit, ndërgjegjësimit, bashkëpunimit institucional dhe promovimit të praktikave më të mira ndërkombëtare.

Në kuadër të veprimtarisë së saj, Qendra synon të identifikojë, nxisë dhe promovojë vlerat më të mira njerëzore dhe profesionale, me qëllim rritjen e aftësive dhe konkurrueshmërisë së individëve në tregun aktual të punës. Gjithashtu, ajo ushtron veprimtari kërkimore dhe studimore në fushën e migracionit, duke analizuar flukset migratore dhe problematikat e lidhura me to, si dhe duke kontribuar në hartimin e politikave dhe praktikave që favorizojnë integritimin social, ekonomik dhe kulturor.

2. Qendra përpunon të dhëna personale në kuadër të studimit të flukseve migratore, identifikimit të problematikave sociale dhe ekonomike, si dhe për mbështetjen e proceseve të integritit të shoqërisë.

Gjithashtu, Kontrolluesi deklaron se në funksion të veprimtarisë dhe përmbushjes së detyrave ligjore të tij, përpunon të dhëna personale për personat “përfitues”, sipas kategorive: “Emër”, “Mbiemër”, “Nr. i identifikimit”, “Nr. telefoni”. Përpunimi i dhënave personale kryhet në mënyrë manuale dhe elektronike.

3. Nga shqyrtimi i dokumentacionit të vendosur në dispozicion, rezulton se Kontrolluesi disponon rregullorë “Për mbrojtjen, përpunimin, ruajtjen dhe sigurinë e të dhënave personale”.

Megjithatë, nga shqyrtimi i përmbajtjes së saj, si dhe nga analizimi në tërësi i provave të mbledhura gjatë hetimit administrativ, rezulton se Kontrolluesi nuk ka parashikuar rregulla specifike mbi kategoritë e të dhënave personale, mënyrën e përpunimit të të dhënave, sigurinë e të dhënave personale, konfidencialitetin, aksesin në të dhënat personale, afatet e mbajtjes së të dhënave, të drejtat e subjekteve të të dhënave, etj., sipas parashikimeve të nenit 28 të Ligjit, me qëllim garantimin e përpunimit të ligjshëm dhe sigurisë së të dhënave, në përputhje me proceset përpunuese që kryen.

Zyra e Komisionerit vlerëson se përshtatja dhe plotësimi i rregullores “Për mbrojtjen, përpunimin, ruajtjen dhe sigurinë e të dhënave personale”, ku të parashikohen elementë të domosdoshëm si, përcaktimi i rregullave dhe procedurave organizative specifike mbi mënyrën e përpunimit të të dhënave personale, sigurinë e të dhënave, konfidencialitetin, aksesin në të dhënat personale, afatet e ruajtjes së të dhënave personale, etj., konsiderohet një detyrim shumë i rëndësishëm, në zbatim të nenit 28 të Ligjit, për të mundësuar shmangien e pasojave të rënda që mund të vijnë për subjektet e të dhënave.

4. Gjithashtu, konstatohet se Kontrolluesi nuk ka hartuar dhe publikuar “*Politikat e Privatësisë*” në faqen zyrtare të internetit <https://www.imzhi.org.al/>, duke mos përmbushur kështu detyrimin ligjor për të garantuar transparencën dhe informimin e subjekteve të të dhënave, të cilët aksesojnë dhe ngarkojnë të dhëna personale në të.

Mospërmbushja e këtij detyrimi nuk është në përputhje me parashikimet e nenit 13 të Ligjit, i cili përcakton se çdo subjekt i të dhënave duhet të informohet në mënyrë të qartë dhe të plotë për qëllimin e mbledhjes dhe mënyrën e përpunimit të të dhënave të tij personale, kategoritë e të dhënave personale, personat që do t’i përpunojnë apo përfitojnë akses në këto të dhëna, afatet e ruajtjes së tyre, si dhe për të drejtat që ai gëzon sipas legjislacionit përkatës, përfshirë të drejtën për akses, korrigjim, kundërshtim dhe fshirje të të dhënave personale.

Zyra e Komisionerit vlerëson se, informimi i subjekteve të të dhënave personale është një nga detyrimet bazë të Kontrolluesit pasi u jep mundësinë subjekteve të të dhënave personale të njihen me të drejtat që gëzojnë, si dhe mundësinë e ushtrimit të tyre në praktikë. Mospërmbushja e këtij detyrimi nga Kontrolluesi mund të sjellë pasoja të rënda sa i përket mbrojtjes dhe përpunimit të të dhënave personale të subjekteve të të dhënave. Informimi sipas përcaktimeve të nenit 13 të Ligjit, duhet të aplikohet dhe garantohet për çdo proces përpunimi të të dhënave personale të subjekteve të të dhënave që kryen Kontrolluesi.

5. Nga hetimi administrativ i ushtruar, konstatohet se Kontrolluesi ka vendosur në dispozicion materiale për zhvillimin e trajnimeve lidhur me kuadrin ligjor në fuqi për mbrojtjen e të dhënave personale.

Pas analizimit të materialeve të administruara, Zyra e Komisionerit vlerëson se, trajnimet në lidhje me mbrojtjen e të dhënave personale duhet të jenë të vazhdueshme dhe të përshtatura sipas nevojave dhe proceseve të punës të Kontrolluesit, si dhe në përputhje me gërmat “c” dhe “ç”, të pikës 1 të nenit 34 të Ligjit, i cili nënkupton se nëpunësi për mbrojtjen e të dhënave personale dhe punonjësit të cilët gjatë veprimtarisë së tyre përpunojnë të dhëna personale duhet të jenë të trajnuar dhe të ndërgjegjësuar lidhur me legjislacionin në fuqi për mbrojtjen e të dhënave personale.

Gjithashtu, Zyra e Komisionerit vlerëson se, bazuar në gërmat “c” dhe “ç”, të pikës 1, të nenit 34 të Ligjit, Kontrolluesi duhet të marrë masa konkrete në kuadër të pjesëmarrjes dhe organizimit të trajnimeve të dedikuara për punonjësit që kanë akses dhe përpunojnë të dhëna personale, në përputhje me kërkesat e legjislacionit në fuqi për mbrojtjen e të dhënave personale.

Trajnimet në lidhje me mbrojtjen e të dhënave personale, duhet të jenë të vazhdueshme dhe të përshtatura sipas nevojave dhe proceseve të punës të Kontrolluesit dhe legjislacionit në fuqi për mbrojtjen e të dhënave personale, me qëllim ndërgjegjësimin e punonjësve, të cilët për shkak të proceseve të punës, janë të ngarkuar për përpunimin e të dhënave personale.

Në përfundim të hetimit administrativ, referuar provave dhe konstatimeve në vend, grupi i hetimit administrativ hartoi procesverbalin përkatës, një kopje e të cilit i është dërguar Kontrolluesit me rrugë postare.

Në zbatim të neneve 87-89 të Kodit të Procedurave Administrative, Kontrolluesit i është lënë afat të depozitojë pretendimet me shkrim, referuar procesverbalit të hartuar nga ana e grupit të hetimit administrativ, përpara marrjes së vendimit përfundimtar nga ana e Komisionerit.

Në vijim, Kontrolluesi ka dërguar procesverbalin e nënshkruar nga ana e përfaqësuesit të tij, si dhe ka deklaruar në rubrikën përkatëse të procesverbalit se “*faqja web <https://www.imzhi.org.al/> është në rikonstrukcion*”.

Në përfundim, Zyra e Komisionerit vlerëson bashkëpunimin e Kontrolluesit me grupin e hetimi gjatë ushtrimit të hetimit administrativ, si dhe angazhimin e tij për të rikuperuar shkeljet e konstatuara.

PËR KËTO ARSYE:

Në zbatim të neneve 13, 28, 34, 81, 82, 83 dhe 84 të Ligjit,

REKOMANDOJ:

1. Kontrolluesi, në zbatim të nenit 28 të Ligjit, të rishikojë rregulloren “*Për mbrojtjen, përpunimin, ruajtjen dhe sigurinë e të dhënave personale*”, duke parashikuar rregulla teknike dhe procedura organizative konkrete për mbrojtjen e të dhënave personale, për çdo kategori të dhënash dhe për çdo proces përpunimi, mbi mënyrën e përpunimit të të dhënave personale, sigurinë e të dhënave, konfidencialitetin, afatet e ruajtjes së të dhënave personale, etj.;
2. Kontrolluesi, të marrë masa për të publikuar “*Politikat e Privatësisë*” në faqen e internetit <https://www.imzhi.org.al/>, me qëllim informimin e plotë të subjekteve të të dhënave, sipas parashikimeve të nenit 13 të Ligjit;
3. Kontrolluesi, me qëllim garantimin e sigurisë së të dhënave personale, duhet të zbatojë detyrimet e përcaktuara në gerrat “c” dhe “ç”, të pikës 1, të nenit 34 të Ligjit, lidhur me trajnimin e punonjësve që kanë akses dhe përpunojnë të dhëna personale, në përputhje me proceset përpunuese që ata kryejnë gjatë veprimtarisë së tyre.
4. Në zbatim të nenit 84 të Ligjit, të përmbushen detyrimet, sipas këtij akti brenda afateve, si vijon:
 - (i) vazhdimisht, detyrimin e treguar në pikën 3 më sipër;
 - (ii) brenda 15 (pesëmbëdhjetë) ditëve, detyrimin e treguar në pikën 2 më sipër;
 - (iii) brenda 30 (tridhjetë) ditëve, detyrimin e treguar në pikën 1 më sipër.

Afatet e sipërpërmendura fillojnë nga data e marrjes dijeni të këtij akti;

5. Kontrolluesi të njoftojë Komisionerin për masat e marra;
6. Komisioneri, bazuar në germën “a”, pika 2, e nenit 83 të Ligjit, paralajmëron kontrolluesit ose përpunuesit se veprimet e përpunimit mund të rezultojnë në mosplotësim të dispozitave ligjore dhe u jep atyre rekomandime lidhur me përputhshmërinë me ligjin. Në rast të moszbatimit të tyre, Komisioneri vepron sipas neneve 92, 93 dhe 94 të Ligjit, për vendosjen e sanksioneve administrative në përputhje me nenet përkatëse, si dhe në përputhje me legjislacionin në fuqi për kundërvajtjet administrative, në mënyrë të tillë që këto masa të jenë efektive, proporcionale dhe me karakter parandalues.

Ky Rekomandim u shpall sot, më 14.01.2026.

KOMISIONERI

Besnik Dervishi